

1 Juaõ

1 Joaõ Tyyriti

1 ¹Jiarỹboho akoreny retỹñnyneri, Jesusimy. Tii Rybe rininirenyra. Tii juhubeu raremyhỹ. Jiarỹboho rabirenyra, tarybemy aholarenyra, tamy reteherenyre, aõbo riwinyreò, tule tamy iny rerimyhỹre. Tii inyeereny umytỹmyra riwahinyneri. ²Umytỹmyra tuedeõna Deuxu inytyby-ribi rehemynyra. Kia umytỹmyra tuedeõna Jesuisi-di rare. Jiarỹboho tuu rabirenyre. Tii rexideõsinyre inyrenyko-ò. Kia tahe adeereny relyreri iwese raremyhỹ wese. ³Aõòbo iny roholare wese, tuu rabire wese, kia tahe tuu relyreri inyboho wiluurenkemy winohõtiewesele røkõhõtinyrenkemy. Inyboho rahõtinyrenyneri iwese Deuxu inytybyreny, Jesuisi Kristu Deuxu Riõre-wana wiwese røkõtinyre wese. ⁴Kia tahe waryberiti adee rewahinyneri adeysamy rakatximahãrenkemy.

⁵Kiamy tahe Jesuisi inyeereny relyreri: —Deuxu txuloosõna wese ratximyhỹre. Deuxu-ò bedeluru aõmydỹñana rehemynyõtyhy kiamy adeereny relyreri. ⁶Inyõ rarybekeki: —Jiarỹ Deuxu-wana winohõtiewesele rahõtinyrahãre. Kia iny bedeluru aõmydỹñana-di ratxireriki, kia iny raruimyhỹre. ⁷Take inyboho loosõna waõmydỹña riwinymyhỹrenykeki iwese, Deuxu loosõnawo-ki ratximyhỹre wese, tai inyboho wiwesele røkõtinyryhỹke. Take Jesuisi, Deuxu Riõre hãlubu ibutumy iny òraru-ribi iny risuhõmyhỹke. ⁸Inyõ rarybekeki: —Jiarỹ raðrarunyõhywãhãre, kia rybe-di tii ixidee riitxenanyryhỹre. Tii raruire rityhynyõre. ⁹Iny taðrarurenymy relyrynykeki, Deuxu tiemy õbiti rare, tii iny òrareny iny-ribi riixãwididỹñnykre. Aõbo iny iwo-ki isuisumy ihỹre tii rityranyke. ¹⁰Inyõ òrarudikemy aõkõ raryberenykeki, inyboho Deuxu ruidumy rarybemahãre. Kia iny Deuxu rybe rieryõhyymyhỹre.

2 ¹Kaiboho wariõre wese atximahãtenyete. Adeereny waryberiti rewahinyneri, kaiboho òrarurenymykeki. Iny òraruna-txi resekeki, iny wiõhedỹdurenny dire. Tii Jesuisi Kristu rare. Òbiti rare òraru ijydydumy rarekemy Waha Deuxuko iny wiõhedỹmy. ²Tii dori itxeõnihikỹ-ki rurura iny òraruòwydỹ-ki. Inysohojile òraru aõkõ rurura tahe ibutumy iny òraruòwydỹ-ki. ³Tiwesebo inyõ rexyrykre

Jesuisi rieryrenykemy rityhynymyh̃ykeki karybe bede ywina wese rierykre tii rexierkyre Jesuisi rityhynyreri wana. ⁴Inyõ rarybekeki: —Jiar̃y Jesuisi reeryre. Irybe bede ywina riywinyõkeki, iny ruidu rare. Inatyhyna rityhynyõre. ⁵Inyõ Jesuisi bede ywina riywinykeki, inatyhymy tawo-ki Deuxuluu rare. Kiawese heka iny rierykre Jesuisi mahãduwo-ki ratxireri-wana. ⁶Inyõ rarybekeki: —Jiar̃y Jesuisi mahãduwo-ki watxireri. Tamy kia wese r̃yikeki. Aõmybo Jesuisi rot̃ỹnyre wese, tii tule rot̃ỹnyke. ⁷Ityhyd̃ỹduseriõre, adee bede ywina t̃myra aõkõ rewahinyreri. Bede ywina tyby kia rare. Kia juhoo teerytenyete. Inyboho wiluurenkemy, kia bede ywina tyby rare, juhoo taholatenyete. ⁸Kia rybe bede ywina it̃myra rare. Jiar̃y adee rewahinyreri. Kristu dee inatyhy rare tule adee inatyhy rare. Bedeluru rõhõnyra, loosõna inatyhy bede-ò ralõmyh̃yre. ⁹Inyõ rarybekeki: —Jiar̃y loosõnawo-ki watxireri. Kia iny taityhyd̃ỹdu seriõre luuõkeki, bedeluru-ki ratximyh̃yre. ¹⁰Inyõ taityhyd̃ỹdu seriõre luukeki, kia sohojile loosõnawo-ki ratxireri. Aõ aõkõ tii riatyd̃ỹnyra. ¹¹Inyõ taityhyd̃ỹdu seriõre rexihitxinykeki, bedeluru-ki rariamyh̃yre. Titxibo rakre rieryõhyymyh̃yre. Bedeluru dori ruetãna rare.

¹²Adeereny warybe rewahinyreri wariõre wese aõraru dori, tii riixãwidid̃ỹnyre Jesuisi òraru-ki. ¹³Iumy mahãdu-ò warybe riti rewahinyre adiwahinyde, kaiboho dori tuu teerytenyete. Tii hykyle dori juhoo raremyh̃y. Ijoityhy-ò waryberiti rewahinyre, Satanasimy tahañnanytenyete. ¹⁴Wariõre, inytyby Deuxu teerytenyete. Iumy mahãdu, adeereny aratyryritinykre, kaiboho dori tuu teerytenyete. Tii hykyle dori juhoo raremyh̃y. Ijoityhy, adeereny aratyryritinykre, Deuxu rybe dori õhõtireny-ki ratxireri, arurudireny dori. Satanasimy tahañnanytenyete. ¹⁵Bede aõmyd̃ỹnana luurenkõmy boibeke. Inyõ bede aõmyd̃ỹnana luukeki, Deuxu inytyby luuna rieryõke. ¹⁶Kia bede aõmyd̃ỹna rare: òraruluuna, aõmy robira-wana tuure, aõna aõnamy ixityhyd̃ỹna. Kia Deuxu-ribi aõkõ nade. Kia bede aõmyd̃ỹna-ribi nade. Kia bede aõmyd̃ỹna-ribi nade. ¹⁷Kabede ixãwikre taaõmyd̃ỹna òta òta-wana. Deuxudeewimy wid̃ỹdu tiu ixãwiõtyhy. Tii awimy r̃yirakre.

¹⁸Wariõre wese. Ikonana beded̃ỹnana iõhõmy roire. Adeereny narybede Kristu òludu kanakemy. Betehe inihe, Kristu òludu sõwemy dehemynde. Kiawese inyboho rieryrenyre ikonana beded̃ỹnana iõhõmy roire. ¹⁹Kia Kristu-ò òludu iny mahãdu wotya-ribi rõhõnyrenyra. Tii ityhyd̃ỹdutyhymy aõkõ ratximyh̃yre. Ityhyd̃ỹdu mahãdu tiu rõhõnyõtyhy. Rõhõnyrenyreu, ibutumy rieryre, kia iny mahãdu aõkõ ratximyh̃yre. ²⁰Kaiboho aõmyd̃ỹnana ibutumy teerytenyete Deuxu Tyytybytyhy direki. ²¹Kia rybe adee aratyryritinyke, kaiboho dori Deuxu rybe inatyhyna teerytenyete. Tiu rui Deuxu inatyhyna-ribi rõhõnyõhyymyh̃yre. Kia tahe teerytenyete. ²²Moheka ruidu rare. Inyõ rityhynyõkeki Jesuisi Deuxu deõd̃ỹna raremy, tii tahe ruidu rare. Inyõ Kristu Deuxu-wana ritxiõnykeki, tii Kristu òludu rare. ²³Inyõ Deuxu Riõre ritxiõnykeki, tii Deuxu-wana aõkõ ratxieri. Inyõ rarybekeki: —Deuxu Riõre retyhynyre, tii Deuxu-wana ratxireri. ²⁴Juhoo aõõbo roholare taholamy toitemyh̃y idi mohõtinybenyke. Idi mohõtinyamahãbenykeki,

Deuxu, Iriõre-wana aõu sõu matxibenyke. ²⁵Jesuisi Kristule juhuu inydeereny narybede, umy ituedeõna inydeereny kidiwahinykemy. ²⁶Kia waritina jiarý wiji rehura. Aitxenadýýdu lau adee reritinyra. ²⁷Abedeerydýýna Kristu tatyytyby adeereny riwahinyre. Tii tahe awanale ratxireri. Aerydýýdu aõkõ adeereny rauhenyrenyeri. Tii tahe inatyhy bedeerydýýna ibutumy araerynanyeri. Rui aõkõ rare. Iwese tii araerynanyeri wese, ibutumy biyrubunymahãbenyke. Kia tahe Kristu-ki hykyle bexiemyhýbenyke. ²⁸Wiji, wariõre wese aõu aõu boibekemy Deuxu mahãduy-ki. Tai Jesuisi kað kedehemynykeu, buberuõtyhy ada maixýruõtyhy ilau. ²⁹Deuxu õbitityhyhy ratximyhýre. Kia teerytenynte. Inyõ õbitimy rarekeki, Deuxu riõremy rareke. Kia tule teerytenynte.

3 ¹Boholake, inytyby Deuxu taluuna nihiký inydeereny riwahinyre. Inyboho dori tii rininirenyre Deuxu Riõremy. Inatyhymy inyboho Deuxu Riõremy roire. Kia tahe ityhydýýdukõdu mahãdu rieryõre. Tiibocho dori Deuxu inytyby rieryõhyymyhýre. ²Waluuna mahãdu, inyboho Deuxu Riõremy roire. Rierykõrenykre timybo iny rokoirekremy. Kia inyboho rieryrenyre: Jesuisi kodobehekreu, inyummy taumy wese risýnykre. Inyboho dori kodobidenykre iwese rarybemyhý wese. ³Inyõ Jesuisi wesemy rarekemy ratxikeki, iwese Jesuisi õbitimy raremyhý wese tii rareke. ⁴Inyõ Deuxu bede ywina rybe rityhynykeki, tii rexiõrarunyke. Kia heka õraruna rare. ⁵Jesuisi dobehede õraru tarasadumy rarekemy. Kia teerytenynte. Jesuisi inatyhymy raõrarunyõhy raremyhý. ⁶Inyõ Jesuisirykihyy rarialeke, tii õraruõmy rareõtyhy. Inyõ õrarumy rarehyykeki, tii Deuxu rieryõhyymy rareke tuu robiõhyymy rareke. ⁷Wariõre wese, itxenadýýdu lau bexiyrubunyke iny aõmydýýnana õbitimy riwinykeki, iny õbitilemy rareke, iwese Jesuisi õbitimy raremyhý wese. ⁸Inyõ õrarunadityhy raretyhykeki, tii Diabo mahãdu-di rareke, Diabo heka õrarauna-ki hyy nodure. Tai kað Deuxu riõre nade Diabo aõmydýýnana ixãwikemy. ⁹Inyõ Deuxusý riõrekeki tii õraruna-txi reseõlemy ratximyhýre Deuxu dori iwo ritymyraneyre. Tii reseõhyky rareke. Deuxusý dori rare. ¹⁰Kia wese iny rieryrenykre inyboho iriõre Deuxu riõremy roire ada Diabo riõremy aõbo, inyõ Deuxu deewimy riwinyõkeki, tii Deuxu Riõre aõkõ rare. Inyõ taityhydýýdu seriõre luuõkeki, tule Deuxu Riõre aõkõ rare. ¹¹Kia bede ywina rybe juhuu taholamy tatemyhý ihãre tadoholamahãte. Kia heka rare: iny wiluukemy. ¹²Iwese Kai taserõre rirubunyre wese aõkõ rikiwinykre. Tii dori Satanasi mahãdu rare. Aõherekibo tasewriõre rirubunyre. Iaõmydýýna Deuxu dee awiõre Iserõre aõmydýýna Deuxu dee õbitire tai tahe rirubunyre.

¹³Waseriõreboho, ityhydýýdukõdu mahãdu eramy ratximyhý. Kia-di bedeõtiidýýomyke. ¹⁴Inyõ ityhydýýdu seriõre luukeki, tii rubumy rýire wese mahãdu-ribi rõhõnyre. Kia reerymyhýrenyre. Tahe umytuedeõna-ki rahara. Inyõ luuõkeki, tii rubumy rýirawese mahãdu-ki ihýmyhýke. ¹⁵Inyõ taseriõre derakeki, tii rubudýýdu wese rare. Boholake, kia teerytenynte. Rubudýýdu umytuedeõna-ki rahaõtyhy. ¹⁶Kiawese luuna rikieryrenke dori Kristu rubu-õ rexiwahinyre inydeereny tõemy. Tai tahe inyõ taseriõre dee rurukeki iluuna sõwereki. Tii tahe awire. ¹⁷Inyõ ityhydýýdu seriõre aõhokýmy rotýýnykeki,

rama rahukeki, tuu robike aõ ijödikeki, tahe iny riwiðhenanyökeki, tii Deuxu luuna-di aõkõ ratximyhÿre. ¹⁸Wariðre wese, luuna urile tuu rybena aõkõ rare. Aõhebo rotÿÿnykemy ihÿre. Kia tahe aluuna inatyhymy biteòsinyke. ¹⁹⁻²⁰Kiawese iny reeryrenyre inatyhyna mahäduwo-ki ratximyhÿre. Jiarÿ arahõtinykeki. Jiarÿ aõkobo ityhydÿÿdumy watximahäre. Deuxu warayky riwiðhenanymy ratxireri. Deuxu warayky ratyre raraykywydynanymyhÿre. Tii ibutumy aõ rieryre. ²¹Waluuna mahädu, ruberuðhymyhÿre tahe iny ityhydÿÿdu mahädu-ki ratximyhÿre wana rieryreki Deuxu iny rityhynyre. ²²Tahe aõmy iny rexitòdenykeki tii inydee kidiwahinyke. Iny dori ibede ywina rybe rityhynymyhÿre. Deuxu deewimy iny riwinymyhÿre. ²³Kia heka Deuxu bede ywina rare. Jesuisi Kristu, iriðrenimy rikityhynykemy. Tule iny wiluuna wiluukemy. Iwese tabede ywina rybe diwahinyde wese rarekemy. ²⁴Inyõ Deuxu bede ywina rybe rityhynyekeki, Deuxu-wana rareke. Tii-wana ratxikemy. Kia wese heka iny rieryrenyre Deuxu-wana iny ratxireri. Deuxu Tatytybytyhy dori inydee riwahinyre.

4 ¹Waluuna mahädu, ibutumy rybe bityhnybenyöke inihe ityhydÿÿrenyömy. Tai biurihike iny rybe Deuxu-ribi inatyhy aõbo ada aõkõre aõbo. Sõwemy rybedu mahädu rõhònymyhÿre. Tahe inatyhymy Deuxu rybemy rybedu aõkõ rare. ²Kiamy Deuxumy rybedu mahädu inatyhymy bierykre, inyõ rarybekeki: Jesuisi Kristu häbu wesemy nade, tii inatyhy Deuxu mahaduõ ihÿre. ³Inyõ kiamy rarybeökeki, tii Deuxu mahädu aõkõ ratximyhÿre. Kia Kristu òluduõ rare. Tamy taholamahäte kanakreð, tahe, kia ratximyhÿre. ⁴Wariðre wese, kaiboho Deuxu mahädumy toite. Rybedu inatyhy aõkõ rare, kia ruru tetatenyte. Deuxu dori aworeny-ki ratximyhÿre Deuxururu, Diabo ruru ratyre rare. ⁵Inatyhymy rybedu aõkõ aõmydÿÿnana binamy relyymyhÿre. Tii dori ka bede aõmydÿÿnana bina mahädu rare. Tahe ityhydÿÿdukõdu mahädu tamy roholamyhÿre. ⁶Inyboho Deuxu mahädu roire. Inyõ Deuxu rierykeki, inydeereny roholamyhÿre. Inyõ Deuxu rieryökeki, inydeereny roholaõtthy. Kiamy rikierymyhÿrenyke inatyhyna mahädu inatyhyna aõkõ mahädu.

⁷Waluuna mahädu, wiluumy rakatximyhÿreny. Luuna dori Deuxu-ribi nade. Inyõ luukeki, Deuxu-ribi tibie rare. Iny Deuxu rieryre. ⁸Inyõ luuökeki Deuxu rieryöre. Deuxu dori luuna rare. ⁹Kiawese inyboho rieryrenyre Deuxu inyluuremy ratxire. Deuxu Tariðre sohojile diteònyde bede-ð inyboho Iriðre-ki umy tÿmyra-ki rahakemy. ¹⁰Kia heka luuna rare. Juhuu Deuxu iny tuu aõkõ rare. Tii tahe inyluure. Tule tariðre diteònyde inyðraru ðwy ðwydÿÿnanykremy. ¹¹Waluuna mahädu, Deuxu inyluurenatyhyreki, tai tahe inyboho wiluumy rokoireke. ¹²Tiu Deuxumy inyõ robiðhykyre. Inyboho wiluumy rÿikeki, Deuxu inywo-ki ratxike. Tai tahe inatyhymy Deuxu luuna inywo-ki ratximyhÿre. ¹³Deuxu iny-ð Tatytyby riwahinyre. Kiamy tahe inyboho rieryrenyre tamahädu-ki ratximyhÿre. Tule rierymyhÿreny tii iny-wana ratximyhÿrenyre. ¹⁴Deuxu Riðremy inyboho robirenyra Tulobixidumy inyboho roire. Tuu adeereny relyryeri. Deuxu Tariðre diteònyde iny tarasadumy rarekemy. ¹⁵Inyõ rityhynyekeki idi rarybekeki: Jesuisi Deuxu Riðre rare, tii Deuxu-di tawo-ki ratxireri. Tii Deuxu-wana ratxireri.

¹⁶Inyboho rieryrenyre Deuxu inyluurenre. Kia iny rityhynyrenyre. Duexu heka luuna rare. Inyõ luuna-ki ratxihyykeki Deuxu tii-wana ratxihyyke. Tii Deuxu-wana ratxihyymyhÿke. ¹⁷Iny luunarenre Deuxu-ò rauhenyõreri. Tai tahe Deuxu wiribi ritxuakre kia txuu inyboho kiatxulau ruberuõtyhy. Iwese tii ratximyhÿre wese inyboho kabede-ki ratximyhÿrenyre. ¹⁸Inyõ luuna-di ratxityhÿkeki, tii ruberuõtyhy. Luunatyhy brebuna-di rehumyhÿre. Aõhõkÿmydÿÿnana brebuna kidiwahinyke. Inyõ brebuna-di ratxikeki, tamy aõhÿkÿmy dÿÿnana kanakre. ¹⁹Juhuu Deuxu inyluurenre, tai tahe inyboho iluurenre. ²⁰Inyõ rarybekeki: —Jiarÿ Deuxuluure. Tai tahe tii ityhydÿÿdu seriõre luuõkeki, tii ruidu rare. Inyõ taityhydÿÿduseriõre luuõkeki, timykibo Deuxu luumy rarekemy iximy rõhõtinyke Deuxu dori tiu tuu robiõhyymyhÿre, taseriõremy tahe robihyky ihÿre. ²¹Kia bede ywina rybe heka Kristu inydeereny riwahinyre: Iny Deuxuluumy ratxikeki, tule tii taityhydÿÿdu seriõre luumy ratxikre.

5 ¹Jesuisi inatyhymy Kristu rare, Deuxu deodÿÿna rare, inyõ rityhynykeki, tii inatyhymy Deuxusÿ mahãduwo-ki ratximyhÿre. Inyõ Deuxu luukeki, tule iriõre luukre. ²Inyboho Deuxuluukeki tarybe ywina rikiywinykeki, tai Deuxu tibiedÿÿna mahãdu luumy rikieryrenyre. ³Deuxu rybe ywina rikityhynyke, irybe ywina dori isiraõre. Tai inyboho Deuxu luuna riteõsinyke. ⁴Deuxusÿ mahãdu bede aõmydÿÿnana bina bina ruru ritamyhÿre iny Deuxu rityhynykeriki, kia bede bina bina ruru ritarer. ⁵Mo tahe kia ijesu tarasadure. Inyõ Jesuisi Deuxu Riõre raremy rityhynykeki, tii bedebina bina ijesu tarasadu rare. ⁶Jesuisi Kristu nade. Inyõ tii riratisebenyre idi rare rurukremy tahãlubu ritxiwikremy. Rexiratisebenykemy sohojile aõkõ nade, tule tahãlubu ritxiwikemy nade. Kiamy heka Deuxu Tÿtyby tuu rarybere. Deuxu Tÿtybytyhy tahe inatyhymy rare. ⁷Inataõ aõmydÿÿnanamy inydeereny rarybere: Deuxu Tÿtybytyhy ijõre, Jesuisi ixirati sebedÿÿna ijõre, Jesuisi rubudÿÿna ijõre. ⁸Kia inataõ aõmydÿÿnanamy wiwese wiweselemy rarybereri. ⁹Hãbu rybe iny rityhynymyhÿre. Deuxu rybe hãbu rybe ratyre rikityhynymy rakatximyhÿrenyre. Kiamy Deuxu Tariõremy rarybereri. ¹⁰Inyõ Deuxu Riõre rityhynykeki, aõbo inatyhy ixidee rieryre. Inyõ rityhynyõkeki, tii Deuxu-di ruidumy rõhõtinyreri. Tii dori rityhynyõreri timybo Deuxu tariõremy rarybere. ¹¹Kia rybe rare: Deuxu inydeereny umytuedeõna riwahinyre. Tii tiu umy ituedeõna iriõre-ki inyboho rakaharenre. ¹²Inyõ Deuxu Riõredikeki, tii umytÿmyra tuedeõna-ki rahake. Inyõ Deuxu Riõre-di aõkõkeki, tii umytÿmyra tuedeõna-ki tahasaõna.

¹³Kia aõna aõna adeereny retyyritinyre kaiboho umytuedeõna-di atxitenyteri bierybenykemy. Deuxu Riõre tetyhynyteny. ¹⁴Inyboho Deuxudeewimy rexitõenymyhÿrenyre, Deuxu iny-ò roholamyhÿre. Kia tahe inatyhymy rybena rare. ¹⁵Inyboho rierykeki tii inydeereny roholamyhÿre, tai rierymyhÿrenyre tii inydeereny riwahinyke aõmybo iny tamy rexitõenynereri. ¹⁶Iny ityhydÿÿdu seriõre rubu-ò aõkõ õraruna-txi resekeki, tamy Deuxu-ò rekexitõenrenyre, Deuxu kia riwiõhenanykemy ixyby Deuxu-ò ròðsekemy. Tii rubu-ò õraruna-txi

resekeki, jiarĩ adee ararybeõkre tamy bexitõenykemy. ¹⁷Ibutumy õbiti aõkõkeki, òraruna rare. Òraruõ rubudỹỹnahyky kidiwahinyõkre.

¹⁸Inyõ Deuxu-ribi tybiekeki, òrarunahyy-ki rareõtyhy. Kia inyboho reeryrenyre. Deuxu Riõre ryrubunymyhỹre. Diabo iribi ròtaõtyhy.

¹⁹Deuxuhõrõ inyboho roire. Kia inyboho rieryrenyre. Kabede bina mahãdu taaõmydỹỹna-wana Diabo hõrõ rare. ²⁰Tule inyboho rieryrenyre: Deuxu Riõre inatyhymy kaò nade. Tii rierynanyre mobo Deuxu inatyhy raremy.

Deuxu-wana inyboho ratximyhỹrenyre, inyboho-dori Jesuisi Kristu Deuxu Riõre-wana ratximyhỹrenyre. Kia heka inatyhymy Deuxu rare. Kia inatyhymy umytuedeõnamy rare. ²¹Wariõre wese, bexihãruke ibutu bedeòraruna lau.